

# Paspels, Rodels, Pratval ed Almens

Ils abitadis en la part centrala da la Tumleatga

■ **Ils vitgs ch'il LIR visita oz èn situads da la vart dretga dal Rain Posteriur tranter Tumegl e Farschno / Scharons. A partir dal 2015 furman Pasqual, Roten, Pratval ed Almen ensemen cun Tumegl la nova vischnanca politica Tumleatga (Domleschg).**

## Paspels (Pasqual)

Anteriura vischnanca, circol Tumleatga, district Rain Posteriur. Vitg aglomerà situà lung la via sin ina terrassa a dretga dal Rain Posteriur, cun ils aclaus da Dusch (fusiunà cun Pasqual il 1648) e Canova. 1237 in villa Pascuals (copia), 1246 de Pascuals, tudestg Paspels (uffizial). 1808 245 abitants; 1850 323; 1900 302; 1950 350; 1960 286; 2000 409. Chats dal temp neolitic e dal temp roman. En il 13avel tschientaner furmava il chastè dad Alt-Sins il center dal possess dals baruns de Vaz en la Tumleatga; el è vegnì demoli, ensemen cun il chastè da Canova (Neu-Sins), en la Faida da Schons. Il 1527 ha Pasqual cumprà ora ils dretgs signurils. Il chastè-baselgia da S. Luregn dal temp medieval tempriv, menziunà il 1237, serviva da baselgia da vallada a la populaziun da la vart dretga da la val. La baselgia da S. Gion Battista datescha dal 1662. Mo Dusch è sa convertì al protestantissem a la fin dal 16avel tschientaner. La chaplutta catolica da S. Maria Madlaina a Dusch appartegnava il 1508 a la claustra da Curvalda. Enturn il 1695 ha Johann Victor von Travers laschà construir il chastè da Pasqual. Fin il 1851 ha il vischinadi da Pasqual fatg part dal cumin d'Ortenstein. Construcziun dal stradun 1896-97. A Pasqual dominavan il 2005 l'allevament da muvel, l'agricultura, la pumicultura e la viticultura (20%) ed il sector terziar (71%). Gronda activitad da construcziun en il novissim temp, causa la posiziun ruasaviva e sulegliva dal vitg. Part da la populaziun da lingua rumantscha: 1880 89,1%; 1980 19,8% (lingua materna); 2000 3,7% / 8,4% (megra lingua/tuttas indicaziuns).

Jürg Simonett

## Dusch

Aclaun en l'anteriura vischnanca politica da Pasqual. 1141 ad Ussce. 1803 41 abitants; 2000 24. A l'entschatta dal 13avel tschientaner èn attestads a Dusch in bain dals baruns de Vaz ed ina curt da la claustra da Curvalda, il 1512 ina curt da la claustra da Cazas. La chaplutta da S. Maria Madlaina, en possess da la claustra da Curvalda il 1508, è vegnida bandunada suenter che Dusch ha adoptà la cretta reformada (fin dal 16avel tschientaner) ed è vegnida incorporada il 1766 en la

plaiv catolica da Pasqual. En il contract da partiziun da la Tumleatga Dadora dal 1596 vegn menziunà Dusch sco in dals set vischinadis. Fusiun cun Pasqual 1648. Construcziun dal stradun Pasqual-Dusch-Tràn 1921-27. Jürg Simonett

## Sins

La ruina dal chastè dad Alt-Sins al vest da Pasqual consista d'in complex dubel cun in chastè avanzà al sidvest ed in chastè principal al nordost, quest ultim cun ina tur d'abitat da quatter plauns cun in'entrada auta ad artg radund al terz plaun. La tur è integrada en il mir da tschinta che posseda ina struttura marcanta (Opus spicatum). L'implant erigì enturn il 1200 era probablamain ina fundaziun dals baruns de Vaz ch'han utilisà el sco center administrativ dal signuradi en la Tumleatga. Suenter l'extincziun dals de Vaz è passà Alt-Sins als conts de Werdenberg-Sargans.

Da la ruina dal chastè da Neu-Sins al sidost da Pasqual sper la curt da Canova èn mantegnids relicts d'ina tur d'abitat radunda da quatter plauns cun curnisch dentada. A l'intern existan fastizs da l'equipament d'abitat, tranter auter ina gronda chappa da chamin, fimagls, in auariel, ina latrina cun lavandin, ina fanestra cun nischa da seser e parts d'ina pigna da laina. Il mir da tschinta circumdescha ina pitschna curt. L'implant è vegnì costruì dals baruns de Vaz probablamain en l'emprima mesadad dal 13avel tschientaner. El è passà sco ierta dals de Vaz als conts de Werdenberg-Sargans. Sco il chastè dad Alt-Sins è era quel da Neu-Sins vegnì destruì dals abitants da la val en la Faida da Schons (1451) e n'è betg pli vegnì reconstruì.

Maria-Letizia Boscardin

## Rodels (Roten)

Anteriura vischnanca, circol Tumleatga, district Rain Posteriur. Vitg aglomerà situà lung la via sin ina terrassa bassa da la vart dretga dal Rain Posteriur, cun Nueins. Ca. 1150 ad Rautine, tudestg Rodels (uffizial). 1803 106 abitants; 1850 135; 1900 147; 1950 178; 1970 152; 2000 281. Chat d'ina fossa dal temp da bronz en la part sut da la vischnanca. En il 12avel tschientaner era Roten in vitg cumpact gruppà enturn ina gronda migiuria dal chapitel catedral da Cuir a cun in'impurtanta cultivaziun dad ers. Il 1527 ha la vischnanca cumprà ora ils dretgs feudals. Roten appartegnava ecclesiasticamain a S. Luregn a Pasqual; enturn il 1150 è attestada ina chaplutta a Roten, il 1697 la baselgia parochiala dettigada als ss. Cristoffel e Giachen il vegl.



Tumleatga Centrala cun il piz Beverin en il funs.

MAD

Cun excepziun da la famiglia dominante von Jecklin, è la vischnanca da Roten restada catolica. La populaziun pratigava antruras oravant tut l'allevament da muvel e l'agricultura. Fin il 1851 è stà Roten in vischinadi dal cumin d'Ortenstein (-Plaun). Correcziun dal Rain cun gudogn da terren en la planira a partir dal 1832. Colliaziun traversala a la Via Taliana/Via Sut (Spleia) 1883, staziun da la Viafier retica a Roten-Riòlta 1896, construcziun dal stradun 1895-97. Il 1967 è vegnì installà a Roten il curtin forestal chantunal, nua ch'ins cultivescha era semenzas custavivlas per ils guauds. Part da la populaziun da lingua rumantscha: 1880 62,2%; 1941 28,6% (lingua materna); 2000 3,9% / 9,3% (megra lingua/tuttas indicaziuns).

Jürg Simonett

## Nueins

Cuntrada da prada al nord da Roten, a dretga da la Val d'Almen (Rietbach). Nueins appartegna a la gruppa dals nums furmads a partir da novalis/novus e signiftga terren runcà da nov. 1375 Awens. Nueins era da vegl ennà in lieu da reuniun e da cumin da la Tumleatga. Ils 25 da schaner 1702 han renovà qua ils votants da l'entira val lur statuts e tschentaments communabels. Quai era il Cumin grond che sa cumponiva da las dretgiras d'Ortenstein (Tumleatga Dadora)

e da Farschno (Tumleatga Dadens). Nueins sa chattava al cunfin da las duas dretgiras. Ils statuts da vallada dal 1702 eran redigids en ina lingua rumantscha originala e vigurusa.

Martin Bundi

## Pratval

Anteriura vischnanca, circol Tumleatga, district Rain Posteriur (avant il 2001 Mantogna), situada sin ina terrassa a l'ost dal Rain Posteriur, cun ils bains da Rapertg Grond, Rapertg Pitschen, Rietbach, Mühle e Hof. Pratval furmava la vischnanca grischuna cun la pli pitschna surfatscha (77 ha). 1506 Pradval. 1850 82 abitants; 1900 67; 1950 83; 2000 240. Il chastè da Rapertg dal 12avel-13avel tschientaner era la sedia dals signurs dal medem num, pli tard tranter auter dals Salis e Plantas. Ecclesiasticamain appartegna Pratval da vegl ennà a la plaiv d'Almen. Reformaziun a partir dal 1592. Part d'Almen fin il 1845, alura agen vischinadi entaifer il cumin da Farschno fin il 1851. L'allevament da muvel, la pumicultura e l'agricultura predominavan. Construcziun da la via charrabla 1895-96, meglieraziun dal terren 1939-44 e 1967-68. Pratval è in vitget senza atgna baselgia, scola, posta e butia; l'anteriura vischnanca stueva collavurar en blers regards cun autras vischnancas. Il 2005 lavuravan 51% da las personas cun activitad da gudogn a Pratval en il sector primar, 43% en il sector terziar (oravant tut pendularis utrò). En ils davos onns ha sviluppà Pratval, grazia a sia posiziun sulegliva, ina grond'activitad en il sector da construcziun.

Jürg Simonett

## Rietberg (Rapertg)

Chastè en l'anteriura vischnanca da Pratval, situà a l'ur da la chavorgia dal Rietbach che separa la planira fritgaivla da la Tumleatga, tudestg Rietberg. En il center dal vast complex sa chatta ina tur quadra da 2,5 m grossezza (13avel tschientaner), la part sura da la quala è vegnida transfurmada en il temp modern. En il 17avel e 18avel tschientaner è la tur vegnida amplifigada a l'intieriur; da quel temp dateschan era ils edifizis cunfinants. Rapertg è vegnì transfurmà pli tard en ina dimora signurila betg fortifigada cun in mir da tschinta represchentativ, muni d'ina curnisch dentada senza valor fortificatorica. Il chastè è probablamain vegnì costruì enturn il 1250 sco sedia dals signurs de Rapertg, attestads en il 13avel e 14avel tschientaner sco ministerials dals signurs de Sax-Mesauc, pli tard da l'uvestg da Cuir. Il chastè da Rapertg è passà suenter il 1349 sco pegn episcopal a divers crediturs ed è vegnì vendì enturn il 1450 a la fami-

glia Ringg. Il 1554 ha Hercules von Salis, guvernatur en Vuclina, acquistà l'implant, nua che Pompejus von Planta è vegnì assassinà il 1621 da Gieri Genatsch. Oz è Rapertg en possess privat.

Maria-Letizia Boscardin

## Almens (Almen)

Anteriura vischnanca, circol Tumleatga, district Rain Posteriur (avant il 2001 Mantogna). Vitg accumulà sin ina terrassa bassa a dretga dal Rain Posteriur, cun Mulegns. Emprima mesadad 9avel tschientaner de Lemenne, tudestg Almens (uffizial). 1803 201 abitants (cun Pratval, fin il 1845); 1850 226; 1870 270; 1900 217; 1950 252; 1970 133; 2000 217. L'onn 926 ha il retg Heinrich I regalà Almen a l'uvestg da Cuir ch'ha pudì extender qua tras sia suveranità territoriala en la Tumleatga Dadens. Restanzas d'ina tur d'abitat, probablamain sedia dal migiur episcopal. Suenter il 1200 èn parts da la curt d'Almen (tratta intensiva da nursas e viticultura) vegnidas attribuidas a la claustra da Curvalda. La culegna gualsra da Schall, situada sur Almen, è vegnida bandunada probablamain en il 17avel tschientaner. Il 1694 ha l'uvestg laschà construir en la vischnanca paritetica dad Almen, reformada dapi il 1592, ina baselgia protestanta en barat cunter la baselgia existenta da S. Andriu (plaiv documentada il 1410). Il 1709 ha Almen cumprà ora ils davos dretgs suverans episcopals. Fin il 1851 ha Almen appartegnì al cumin da Farschno. Il clima miaivel permetta a la vischnanca d'allevar muvel e da cultivar ers e puma. Il 1909 è la via charrabla, che collia Almen cun il stradun, vegnida schlargiada. Il 1990 sa chattavan nov da las 22 plazzas da lavur en l'emprim sector. Dapi il 1970 contribueschan pendularis (1990 71%) ad in augment da la populaziun. Part da la populaziun da lingua rumantscha: 1920 44% (lingua materna); 2000 2,8% / 3,9% (megra lingua/tuttas indicaziuns). Almen è il lieu da cumin dal circol da la Tumleatga. Meglieraziun generala iniziada il 2003.

Jürg Simonett



Chastè da Rapertg/Rietberg en vischinanza da Pratval.

10

## Lexicon Istoric Retic

Il LIR cumpiglia bundant 3100 arttgels (geographics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.